

四庫全書

集部

欽定四庫全書

西巖集卷五

元 張之翰 撰

五言律

次韻荅寄閨風舒先生

聞說薌巖老風情不減前
菊盤秋熟蟹竹枕晚涼
蟬碑碣僧頻謁詩囊客自編
梅花紫溪路一別又三年

客鹿頂承張景山寄詩次韻奉荅

但得無拘束身輕處處仙
清談煨芋夜陳夢種花年
水

竇羊腸折山籬麋眼編詩來正清絕松下忽聞鶉

魏縣方潼渡遇趙夢符趙方以東曹令史補荆

南行臺掾故送之

每憶東曹掾驚逢御水潯壯心鴻的的行色馬駸駸天
入荆南遠雲連薊北深幾時賢相府千里重相尋

送趙御史良貴還內臺兼寄太初侍御諸公

臺本無南北人何間古今薦賢惟恨晚嫉惡不嫌深若
輩誰知已吾儕自賞音清朝崔魏在肯負此時心

舟中書事

船尾載家具船頭置僕僮
柁鳴離岸水帆飽順沙風
行色畫圖裏去程文字中
此心何自急先與暮潮東

局促扁舟裏長驅似不任
人皆愁着淺我獨畏臨深
風雪三更夢烟波萬里心
詩成三詠罷一笑孰知音

水影搖蓬艫烟霏濕毳袍
馬迴驚墮絳人憇得橫篙
偃仰從吾便扶持謝爾勞
陽侯多見護竟日不風濤

行李趨都急輕舟逼凍開
日高帆影動風緊拖聲哀
岸

引枯蒲去天將老樹來此時哦此句愈愧竹溪才
水宿已十日船行纔一千鄉音近殊俗海氣濕炊烟家
在青龍背詩成白鳥邊篙師解相慰雲際指幽燕

代傳夢得為鄭松憲題

相逢交未深一笑便生春松作四時友憲無半點塵詩
囊為活計屢隱着吟身似此知音者江湖能幾人

次閻子靜學士韻

後會應難卜前盟未易尋江空鳳城遠天濶雁書沉愧

我無他技思君漫苦吟一盃多少意香冷軟燈金

同諸公和徐雲卿智樂亭五詩韻仍以聞道危
亭好為起句

聞道危亭好于今隱可招干戈幾書簾天地一詩瓢野
色低晴樹秋聲接暮潮微官如我脫一往復何遙

聞道危亭好臨流稱此名塵埃無一點心跡喜雙清山
勢屏風合湖光鏡面平主人誠好客擬結歲寒盟

聞道危亭好層簷壓巨津野雲閒就宿秋水澹相隣鐘

鼎誠他物琴尊樂此身蕭然何所似太古一遺民
聞道危亭好心遊已不忘宜為智者樂獨占水之陽曉
擔魚蝦賤春盤笋蕨香他年人指似應號鄭公鄉
聞道危亭好烟波不盡頭人家依老岸海市控重樓心
與紛華遠身因靜境留東華塵土客題詠愧名流

開船

水宿四千里船行第一程岸隨人北去雲送我南行艣
畫之玄字柁鳴鵲鵲聲親朋入城去獨酌兩三觥

行至通州河上

幾壺光祿酒一卷翰林詩
流水登舟遠斜陽上馬遲
無人相慰藉有限自支持
回首都門柳青青記別離

泊河西務

牽路緣高岸風橋轉古隄
村墟全寂寂風日便淒淒
平野無人種深村有鳥啼
近都纔百里特地作新題

長蘆與趙淳父飲

我恰維舟住君來策杖尋
同傾一樽酒細話十年心
日

月滄波急煙花紫禁深相逢俱老大欲別更沉吟
霜雪添新鬢塵埃減舊容百年渾是夢四海幾相逢宦
味黃蘗淡人情白酒濃明朝放船去煙水又重重

靜海

靜海人家好連延兩岸頭輕風搖五兩微雨濕孤舟聞
鳥催蠶老逢人問麥秋有書無處付腸斷水東流

宿碾莊

正尋山下路忽得水邊村晚穗猶棲畝寒燈自出門坑

溫便膝病枕冷醒詩昏野老能留客呼兒具早飧

興濟縣

興濟縣城下扁舟不敢行樹連雲脚動風捲浪頭生祇
道甘霖作誰知亂電傾我方為郡去不覺暗心驚

新城道中

十月新城道霜林葉未殷有田皆白水無地不青山境
在塵埃外人行罨畫間平生愛瀟灑詩興不能慳

禹城冬至

馬上逢冬至天涯動旅悲祇應垂老母正念遠游兒
雨露恩多日風雲氣少時何當北堂上兒女共熙熙
不展攀龍手空勞走馬身一陽纔至日千里未歸人
薄宦時何補他方節又新家人正殘夢簫鼓動比鄰

至青州

不喚青州渡于今十六年路衝當水驛市早集商船鵝
鴨皆成隊魚蝦不費錢親知喜余至但怪鬢蒼然

書膠州解

天馬平南後戈船不北侵只知烹海利誰識擲河心地
本連齊俗人全帶楚音城中誰守令德化正須深

出萊陽

歷遍東三郡纔離海一隅無家人不病有地麥將枯白
髮淘金叟青山採石夫聖朝如有問願上此方圖

烏泥涇雨夜二首

永夜深村裏求明未肯明徧思千萬事纔數二三更高
枕仍燈影虛堂更雨聲寒難在何處快作一時鳴

展轉不眠夜催科未了心無愁還易感有病更難禁風
雨烏溼暗雲濤碧海深誰能呼日出一照散羣陰

順風

連朝行逆境今日得亨途斷岸如奔馬輕帆似去鳬工
師皆偃卧童僕亦歌呼世事皆如此來舟莫嘆吁

二月初一日雪

二月雪最忌江南尚庶幾危簷成雨滴疊嶂失烟霏未
止遊春舫仍添禦臘衣老梅風骨別不肯學渠飛

二月初二雪未止

今日驚蟄日無人敢料天正須風淡蕩何苦雪連綿落
片剛隨馬流澌枉礙船誰言春信晚已到小桃邊

夜坐

小樓春雨裏耿耿不眠時心上十年事燈前半夜思無
人閒與語有句忽成詩三嗅餅梅了幽懷祇自知

樓居四首

和者相推重於余未敢安一時搜句易四海賞音難政

自忙中得多慚靜處看篝燈續來詠不覺夜闌珊
今日天色霽幽懷得好開花香呼鶴逕風軟釣魚臺小
圃春皆遍方池水自來夕陽人散後隨意坐莓苔

到郡已兩月都無幾日間心移詩卷外身在簿書間月
滿清源洞雲深紫帽山何時一樽酒同去復同還

自愧無才甚誰知賦分偏常教游宦處不費買山錢舊
藁增新藁今年勝去年諸君果何見稱作濟時賢

見鶴

仙人渺何許仙驥尚相隨特地來祥瑞凌雲見羽儀九
皋聲斷後三島夢回時恐是雲間至無人一問之

食椹

紅白共纍纍嘗來黑最奇粒攢形似乳汁蘊味如飴村
落蠶眠後園林雀飽時行軍休盡摘留濟主家饑

題劉太初僉事母氏八十詩卷二首

自昔識君面便知君母賢橐鞬期盡變詩禮要相傳白
酒平反後春風戲綵前恠予詩較晚雲外鶴蹁躑

子職九遷易親年八十難歡為介眉酒孝是駐顏丹獻
壽門闌窄忘憂境界寬瓊華春未老要待板輿看

壽梁夢臣母八十二詩

世固八秩少人誰五福全陰功雖是我陽報豈非天子
用廉名貴夫由隱德賢壽源流不盡洹水日涓涓
年已期頤近顏猶半百同眼明針有用身健杖無功慈
教三遷後平反一笑中北堂誰慰眼五綵鬧春風

過山家

信馬秋山去山家勿用驚羣兒收橡栗一犬護柴荆可
恠居僧俗殊無好客情夕陽高興盡却向石河行

寓曾府樓

萬里來泉郡樓居亦自安祇知深院靜不覺畏途難詩
向梅邊得書將燭下看無人共清興簾外雨珊珊

聞道曾家府元如畫障開已更新世界猶有舊樓臺海
瘴風吹去山寒雨送來主公今已矣倚杖立蒼苔

苦無官事迫暫得客心閒萬井鉤軒底千帆隱几間細

流爭赴海小樹強遮山竟日無車馬孤雲自往還
人去名猶在樓高氣自偏紫青常入座風月不論錢梅
記繁華日松知締構年能持門戶好正賴子孫賢

次韻荅應德茂雪後見寄

山中不來久何處度殘年人悶如中酒村荒似禁烟將
茶冰筋煑移枕雪蓬眠更肯狂歌否春風雙玉船

欽定四庫全書

西巖集卷六

元 張之翰 撰

七言律

送張仲悅荆南憲司知事

出佐分司萬里行
選才今喜到書生
不須賓幕分高下
自有人間作重輕
風折雁行離海嶠
霜隨馬足入江城
對床詩句忘年序
便是慇懃送別情

南臺賈都事索餞行

噴詩嚼酒多譏議玩水登山足是非風憲果從今後立
人材寧比向來稀栢臺霜重羣鳥散淮甸風高獨鶴歸
一片百花莊上月因君南去重依依

寄上都安御史于都事

放浪江湖鬢欲霜何堪來補地官郎都將雲水三年樂
併作京塵一味忙人事只今俱欲廢交情依舊不曾忘
昨宵夢裏尋君去月滿灤河夜色涼

寄三山陳菊圃

夢中老圃菊花開擬賦秋香愧不才庭有諸郎皆玉樹
門無雜客半蒼苔說湯東澗言猶記聞卞南洲事可哀
辦得薦賢書一紙只愁不肯出山來

寄泉州謝嬾庵

尼之能詩者
今九十餘矣

細嚼檳榔擘荔枝令人常憶嬾庵師路遥萬里莫通訊
年過九旬猶作詩傳法山中雖有弟論才天下更無尼
當年驄馬人將老不似梅邊唱和時

有寄

此身時卷或時舒一片秋雲聽所如世味直從嘗後得
人情宜向遠中疎動而得謗無非命樂以忘憂只是書
見說松廳賢俊滿近來誰敢問新除

壽木平章

魯齋一脉未曾衰黃閣須公重護持人少見威皆起敬
士多感德不求知門前寂寂無私日天下熙熙有道時
憂國何妨瘦如鶴此心方寸儘堪醫

壽王彥博都事

仕正強時却處閒閒中委順最為難樹萱近戶供親樂
移竹當軒伴歲寒風浪莫如人海惡乾坤不似醉鄉寬
我知造物安排意留着功名向後看

元會

天上輕飄合殿香東風簇仗曉生光春回龍首初三日
暖入鵷聯十八行制度仍存周禮樂頌歌當擬漢文章
嵩呼華祝懽聲裏百福都歸萬壽觴

與大宴

四海春風大宴初
天門拂曙百官趨
漢庭圖籍三朝後
虞殿簫韶九奏餘
近侍人行金剎刺
遠蕃使坐錦氍毹
微臣醉飽無能報
願誦太平封禪書

上張尚書子友

鳳麟人物更能詩
出入青宮鬢欲絲
寶繪過於王駙馬
好賢渾似鄭當時
遂初亭館春風早
詹事門牆畫景遲
見說調元消息近
陽和先到小桃枝

和趙子昂郎中見惠韻

簿領迷人不到詩筆頭何自得雄奇從知朝市奔忙日
難似江湖放浪時南國暮雲空漠漠西山晴雪自離離
客懷猶賴君相慰剩為梅花和幾詞

君有和
余梅詞

送李仲芳赴臨安行省掾

莫惜辭燕遠入吳聖朝南北混車書四千里是兩都會
三百年開一坦途簿領定應談笑了宴遊多在治安餘
西湖烟景錢塘月儘作歸舟卧看圖

和閻學士聽詔詩韻三首

德是皇基政是階羣陰散盡日華開美名本自臣心報
寬澤都從聖意來萬里坤輿得霖雨八荒屯難解雲雷
蕭韶九奏春風裏願祝君王第一杯

聖主如天不可階五雲深處詔書開九州四海頌聲作
萬口一辭和氣來物泰民熙霑雨露河清海晏息風雷
寬恩便是無疆壽未用垣平玉刻杯

天上三階是泰階冊名纔進瑞光開南山壽址萬年峻
北海恩波千丈來香引僊禽紛似雪風吹驛騎疾如雷

誰將淮海都為酒盡醉堯民不用杯

送何侍御赴南京憲使之任

八載烏臺一日如出臺還似入臺初舉家孝養無非祿
行李清貧只是書近地光輝衣繡處大河風浪簡霜餘
明年定有還公詔却向蘆溝候使車

送鄉士曹顯祖

同是天涯未得歸送君情思獨依依一時得志古來有
三世讀書天下稀明月未離淮水去白雲先傍太行飛

十年京國成何事慚愧西溪舊釣磯

中秋會飲

昨歲中秋陪右丞馬公張禮部夢符夾谷侍
御士常飲右轄公寓第時公病新起臨風對
月浮鍾舉白諸公雖不敢盡其歡亦皆被酒
而散越明年是夕公以舊約又會馬張二公
泊不肖於其家酒光月色俱不減前席唯士
常侍御南去復有唐工部壽卿趙兵曹子昂

李司業兩山數佳客在座酒再行公命作鄙
語以倡端竊謂方政令益嚴公務增劇上下
奔趨之不暇能復此會不負良辰為諸公浣
簿書之塵盡文字之飲以此較彼非盛事而
何因作二詩紀之且重為來歲張本云

秋到平分一氣清世間最好是新晴不辭春露黃金盞
拚醉秋風白玉京人意偏於今夜別月華渾似去年明
賤天有語無多祝莫放浮雲半點生

舉杯邀月立多時祇恨天東月上遲
世界白毫迷望眼
乾坤清氣入詩脾平生歡會真難得
此夕晴明孰可期
但願羣公長壯健一年一醉不須辭

和劉漕君卿留別韻二首

野菊詩成便出倫
期君不墮世間塵
當時舉目無餘子
今日論心有幾人
舍作梗楠老空谷
用為舟楫濟通津
悠悠許事都休較
留取生平一點真

擬向江湖作隱淪
誰教再入軟紅塵
無根怨謗嘗求已

有數行藏豈在人今歲雲霄瞻北闕去年烟雨渡西津
歸心幾逐征鴻發書破南雲恨未真

為東崖學士壽

生近新春氣不寒輕黃浮動兩眉端乘時致位世皆有
極力薦賢人所難一自承恩來玉署幾回論事上金鑾
從今鄭重經綸手待向麒麟畫裏看

為何叅政壽

濟時籌策元非淺學道功夫近愈深晚歲松筠無改色

春風桃李盡成陰。力辭憲府餘清議。奏入中書豈本心。
洛水西邊山似畫。安排杖履老相尋。

與馮呂飲秋香亭

龐眉書客感秋蓬。更在京塵瀕洞中。莫對青山談世事。
且將遠目送歸鴻。龍光文采今誰似。鳳翼年光夢已空。
剩著新詩記今夕。尊前歸客嘆衰翁。

酌樂御史鄉先生五首

鬢毛經亂已全皤。留滯金臺歲月多。中統初頒建元詔。

先生纔賦式微歌歸來喜動陶彭澤
矍鑠甘輸馬伏波
長記燈窓索新句枯腸一夜因搜羅

壯我鄉閭亦豈他如公才德孰云多
老來尚說攀髯夢
貧煞難為叩角歌
淦水老仙留正派
邯鄲小子賴餘波
風流耆舊今安在不及皇家結網羅

驄馬何人敢並珂
雷程伯仲不須多
都將痛哭秦庭淚
翻入招魂楚些歌
身後聲華塞霄壤
生前章奏湧濤波
酹餘尚覺孤風在一鶚橫飛出罽羅

摩空一賦有誰過北渡詩詞日更多舊作嘗參坡老句
新聲未害雪兒歌情如花插餅中朶趣似風行水上波
想到筆端游戲處心胷何物不包羅

擬尋樂易却違和一病孿拳數載多無路問天三太息
有時對月一高歌紫山殘照餘荒隴白簡清霜委逝波
半夜燈前兩行淚東風吹濕越衫羅

送郭子堅御史雲南之行

去年南詔恰還京今歲重為萬里行六月分臺霜氣重

一星照海瘴烟輕雲連諸葛舊征路天入太和新附城
遠部生靈疲瘵久不須威猛且寬平

和李郎中才甫韻

無意當途著姓名優游翰苑儘為榮柳張翠幄遮門合
葵擁紅旌夾道生薄有文華慙位重苦無官事覺身輕
幾年老眼塵昏了近日看山却漸明

和張可與郎中見寄韻

去歲年光欲盡頭惡懷惆悵獨登舟有書漫託霜前雁

無日不思沙上鷗
暮走晨趨非樂事
高歌痛飲是良謀
近來客夢無拘束
長到淮南百尺樓

上巳日遊玉泉呈劉侍御

十五年來走鳳城
玉泉今日一經行
湖光與世淡無味
山色向人濃有情
物外是非元自少
眼前寵辱不須驚
詩成莫訝忽忽去
恐被山僧問姓名

郭司丞善甫以馬上之詩見示因次韻奉答

桂玉京華又幾年
故園依舊未曾還
悠悠造物乘除裏

碌碌隨人俯仰間，貴客交游方雨集。
冷官心事只雲間，夕陽歸騎無相促。
正數城頭雨後山。

送鄔弘仲嵯縣尹

新賜除書墨尚香，便教歸路日增光。
一溪剡水琴弦外，千仞稽山硯匣傍。
君去當尋戴安道，我慚不及賀知章。
文昌宰相賢知己，暫屈山城未可量。

送項季約

辟奏來從舊所知，蜀天萬里去嫌遲。
青油幕建元寮貴，

錦領首參小校隨千古淚痕諸葛事十分行色杜家詩
益州別駕如相問為說思君草檄時

留別具瞻李侍御

相逢無日不相從十日相從酒醉中四海交遊似君少
幾人氣味與余同消磨舊恨香烟碧揮灑新詞燭影紅
明日鳳凰臺上去楚天高處望飛鴻

次可與錢行韻因以為別

聲本相同氣亦同憶曾長句送吾宗十年往事東流水

一點歸情南去鴻
館閣文章非陸相
江湖烟雨是吾儂
書來何用稱名爵
不寫鱸翁即鶴翁

演翰林徐公奇寒詩意

余去歲過東平時宜山公歸自江北有再入
翰林之命余意旦暮成行矣越明年春孔君
從善來任濟南幕職出公春分日奇寒詩且
寄示不肖與王教授諸君三復之老氣渾然
一寓諸理無半點鑄鑿痕真樂天香山詩

堯夫安樂窩中語也至誦東郊便是華胥國
擬逐春風醉小車兩句又可見不汲汲於此
行之微意輒不自揆取元李演太白紫極宮
感秋詩例以公往歲春分景儘佳七字為起
句擬賦二篇雖不免效顰之誚亦庶乎少致
敬慕之萬一諸君宜共賦之

往歲春分景儘佳今春寒慄足驚嗟非關此際天心別
祇恐從前月令差冰雪不來新燕子霜風空動小桃花

儘渠料峭能多少不到東臯老嫗家

往歲春分景儘佳而今節物未容誇衣從禦臘重猶着
酒為藏春遠亦賒莫訝客寒多似暖由來正氣少於邪
天公不禁宜山筆醉墨偏開錦樣花

趵突泉

龍吐鯨噴地軸摧初疑直上却低徊簸空海藏湯千沸
蹙碎山根雪一堆半夜鬼工穿漏穴終年神物護砮雷
飛流濺沫知多少不隔青州萬馬來

闕題

石礙奔泉着岸行
含商泛徵自泠泠
彈成流水高山曲
瀉盡金堂玉室情
一派清風山鬼弄
半岩明月水仙聽
東陽亭下南嶒壁
未必無絃有此聲

寄解子升兼簡杜都司

君道背時多似我
我知應物不如君
三千北海從渠輩
十二東秦著此身
雨洗大明湖上月
風吹華不注頭雲
少陵後裔如相憶
爲寄新詩一寫真

寄曹天爵

詩句驚人自昔聞，風流全似老徵君。
祇從北渡南遷後，便有他州異縣分。
浮世難逢真賞識，短書聊致小慇懃。
何時滏水西邊去，共對青山看白雲。

寄李元輝

幾年不見雲庵師，心欲全灰鬢欲絲。
醉我恨無千日酒，憶君嘗寄四山詩。
竹床風雨鳴琴夜，布袖蛟龍落筆時。
辛苦江湖萬餘里，只除敗報故人知。

寄陳月觀

淮南一學費支撐
淮北諸公問姓名
紅米黃蘗徒自苦
青衫白髮向誰榮
惡常有蔓何時絕
謗本無根到處生
最好風軒幾竿竹
為君高枕作秋聲

寄劉梅溪

收拾篇章入集中
寧論南北與西東
掛名正自不須我
好澹更誰能似翁
夜氣濕衣花著露
秋聲入硯竹生風
余生豈減梅溪興
政拙心勞恨未同

寄張可與

初到京城雪尚飛
匆匆又過藕花時
應酬常有千端事
唱和殊無一字詩
斜月透簾朝起早
深泥沒馬夜歸遲
煩君天壁亭邊過
說似滄波白鳥知

寄完顏誠甫諸君

走遍江湖恰得閒
閒來猶恐未能安
一身完壁固自可
衆口鑠金原不難
收拾風烟詩卷重
消磨日月酒盃寬
有時忽起思君興
騎鶴樓高獨倚欄

和王文琬見惠詩韻

悞却醒吟與醉吟此身麋鹿強冠襟古來賢達最高處
世上榮枯不動心空谷烟霞容我老畏途風浪儘渠深
平生愛讀留侯傳近日書為座右箴

和馮性齋韻二首

換得新除一紙書老天又不許安居纔分錢幣離金部
未用篇章動石渠吾輩幾時能辦此斯文一綫竟何如
五湖春水三千頃何處而今無白魚

一笑人間升與沉焉知來者不如今有官須作夢幻想
無事且為長短吟甓社新耕春水滿邯鄲舊隱白雲深
幾年不辦南歸計豈是中朝絕賞音

追和任梅臞留別韻二首

自斷功名未了因儘渠時事日更新情知魚蟹鄉中客
豈是鷗鷺隊裏人船尾有時嘗載酒筆頭無物不生春
春風擬向珠湖去一洗胷中萬斛塵

擬與梅臞結後因今生已見白頭新交游耆舊最知已

文采風流俱可人
一別還經七寒暑
相逢又見幾秋春
西風落日都門道
悵望南飛一縷塵

方虛谷見和花朝復用韻

氣涌胸中老漸收
年來又不似中州
催科星火千憂了
怨謗丘山一笑休
忙裏有詩聊信筆
病餘無力更登樓
兩高峰在欄干外
恨不攜壺好處遊

和趙學舟韻二首

來蒞雲間二陸鄉
愧無才似古循良
祇因朝聚并昏散

悞却長篇與短章涼露陂塘蓴菜熟秋風亭館藕花香
風光雖好難留客明歲而今可治裝

冗官政自不須儒空擬興公賦遂初歸興幾時浮畫舸
秋聲一夜動干旛時和歲稔偶相值政拙心勞何可書
為謝諸君休見訝此來端只為鱸魚

寄徐容齋叅政馬性齋右丞

謫居江海望蓬萊九虎門深不下階天上故人重會面
雲間薄宦也舒懷廉車舊倚徐叅政右轄新添馬性齋

曾念歸舟行有日
麥花風裏渡長淮

寄王宿州晉卿

中朝多士正如雲
外郡何妨寄此身
豸角驚回十年夢
馬蹄行遍四郊春
學中已有收書者
境內寧無發粟人
却笑松江張府尹
擬將何惠及斯民

和方虛谷寒食感事二首

連朝春冷恠春遲
禁火藏烟早已而
客舍旋分紅杏朶
人家新插綠楊枝
安排北海樽中酒
準備東君路上詩

萬事皆從天素定
心頭為甚亂如絲

畫出人間百五天
花飄紅錦柳飛綿
風光已是三月裏
況味全非十載前
樓閣晝長喧語燕
江山春老怨啼鵲
明朝又向松江去
且寄閒愁在酒邊

寄張可與簽省

造物年來苦戲人
蹣跚兩腳上青雲
幾番野鶴空呼侶
一點沙鷗不著羣
田里他年須許我
朝廷今日又思君
躬耕只合南陽老
為甚虛名世上聞

次韻答陳叔高來詩有秋風道上誰青眼夜雨
燈前自白頭之句甚佳叔高名童登

蚤種青蒲已滿溝憶栽黃菊亦成丘不辭西日射牛背
尚勝北風吹馬頭新雨客疎塵鎮几故山秋淡樹藏樓
艱難終覺鄉情耐準擬行窩處處留

次韻答胡山甫兼簡汪日賓山甫名哲台人日
賓名元寅邑人

白髮詩翁南澗居肯來與子不相疎久知諸老難折簡

端為此家多貯書
談吐清無涉俗處
容顏衰似避兵初
溪梁一別還經歲
接得新詩錦不如

亂後交朋星散居
如君那得易親疎
耐多但有客滿座
忙絕不令兒廢書
萬里山河蓬鬢底
一春風雨杏花初
閒身共遜耽詩老
野服枯藤得自如

寄何右丞二首

長記都門送別詞
南來一讀一迴思
已離猶自防遭謗
未滿如何敢寄詩
流轉殊方情緒苦
侵尋老境鬢毛知

諸君近日安排盡未識遺才更有誰

年少追隨鬢欲霜可無清夢到門墻
瓜期三載又過却梅信一枝誰寄將
鴻雁未安徒作陣鱸魚雖好也思鄉
百年強半光陰了祇有還山望主張

寄趙左丞時自鳳凰山夜歸舟中作

事事如今與願違鬢邊禁得幾多絲
青燈逼案公忙處斜月穿舟夢覺時
滿目風波何日了勞心歲月只天知
九山秋色明如錦誰信曾無一字詩

和李兩山見贈韻二首

古錦囊深走夜光
春風筆老挾秋霜
讀君兩藁未能遍
笑我一官如許忙
試問朝中紫袍客
何如江上綠蓑郎
南浮恨不曾相見
細嚼梅花醉幾場

詩卷要留天地間
休辭刪後更須刪
自憐不是張三影
誰使相逢李兩山
吳楚江山盡游覽
幽并豪傑半追攀
此情枉被功名惱
賸著春風染鬢斑

寄呈卜平章

往年曾送上鑾坡萬里南遷奈命何宰相薦賢今有幾
翰林為郡古無多赤心報向江湖遠白髮徒勞歲月過
好放西巖巖下去留將老耳聽賡歌

奉寄容齋大叅為登舟一笑


第一三賢創作祠儘堪書入去思碑功名富貴有如此
政事文章誰似之餘及解牛除惡日扁舟載鶴治裝時
不妨且近西湖住過了梅花動未遲

次路司諫韻

樓上繁華掃地空樓頭依舊見雲籠
斷碑文字摩挲外廢苑規模指顧中
一片古苔深暮雨百年喬木動秋風
無人解得登臨意獨倚欄干數去鴻

寄留承旨申齋

直到鰲峯最上時依然精力不曾疲
小車應詔詢時事大筆承恩草制詞
前輩諸公誰健在斯文一綫要維持
風姿祇是柯山叟昨夢分明見爽基



欽定四庫全書

集部

西巖集卷七

八

詳校官中書臣李彤

侍讀臣孫球覆勘

謄錄監生臣王人作

謄錄監生臣秦澐

欽定四庫全書

西巖集卷七

元 張之翰 撰

七言律

贈鄭東谷

乘興而來寓谷陽
雙瞳炯炯鬢蒼蒼
身隨野鶴情相熟
詩帶鱸魚句自香
世事到頭俱是夢
人生何處不為鄉
尤山也似三山好
坐榻無氈儘不妨

間學士子靜以詩見寄依韻奉答二首

閒身無物可遮羅
淡愛青山掃黛蛾
啼鳥喚人離憲府
好風吹句下鑾坡
一千八百盡烟景
二十四橋皆月波
天上文星是知己
老於淮海又如何

一任閒庭雀可羅
豈能求媚畫雙蛾
人情南海與北海
仕路上坡還下坡
自乏才華依日月
枉將狂直犯風波
世間讒口炎如火
奈此扁舟一葉何

與趙子昂學士相別於燕
今四寒暑一盃道舊
因餞以詩

江北江南會面難相逢問訊舊朝班人雖巧宦亦能殘
天若惜才方與閒金馬玉堂離別後白衣蒼狗笑談間
藕花時節尋君去先看吳興一帶山

壽趙方塘學士

掖垣花外識君初眉宇分明畫不如杜若秋鴻久相避
玉堂金馬忽同居斯文於世誰消長吾道如雲自卷舒
十五年來恩最厚不妨三上治安書

壽杜文玉先生

白頭高卧命安齋擬把功名付酒杯愛傳已成元凱癖
工詩深得少陵才天荒氷井春愁在月滿銅駝夜夢迴
政恐司天飛急奏少微光彩近三台

贈奧屯僉事周卿

聞道揚鑣出帝京此心嘗到鄴南城共傳筆正如心正
獨愛詩聲似政聲六月隕霜冤已散五原飛雨獄初平
繡衣本忘埋輪後賴有當時慕蘭名

寄許御史獻臣時授福建僉事

綠鬢朱顏立要途先生老矣入閩初若論渠帥寧無命
比似諸君尚有除治世正須三尺法累人還是五車書
珠湖風月清如許何處茅廬不可居

送王朋益燕南僉事

一官初不待瓜期纔見青驄又繡衣北道人才公遴選
南臺綱紀要維持廣陵日暮羣烏合魯甸秋高獨鶴歸
過我西巖煩寄語明年收拾草堂賢

和姜中丞韻

抖擻三年薄宦塵更無一事可關身東鄰不若西隣祭
北阮何如南阮貧眼底江山千古在胸中風月四時新
自從勘破榮枯夢何處熙熙不是春

何中丞以東山憲使遂其請喜而作詩用餞行
色二首

宰相元來多守郡中丞何害復提刑風搖箕尾移卿月
雲破虛危現使星人道先聲動山嶽我知清望在朝廷
鵲華喜作迎公色說比當時百倍青

一道澄清人所難在公都付笑談間官辭要地寧非福
身寄監司便是閒公外有時臨北渚眼前無日不南山
山東父老應相語却恐微車又趣還

雨中與方虛谷飲公有詩見示次其韻二首

南北東西萬里餘年來事事不如初詩窮但作平平看
政拙宜為下下書金馬玉堂非敢戀清香畫戟且叨居
十年再對吳山飲祇有詩仙未肯踈

雨脚垂垂尚未收三分春色二分休且携一斗新槽酒

來飲三間小市樓浮白可忘官裏事潮紅不勝鬢邊秋
人生適意方為樂何用虛名遍九州

次韻

過湖曾覓白雲龕題遍高峯北與南夢寐煙霞雖是澹
膏肓泉石却如貪袖中嘗有呼猿果坐上寧無抵鵲柑
長笑分司太清苦獨遊之外百無堪

送魏按察太初西還

君以奔祖母喪到京

共愛文章有典型獨知忠孝是生平漏天南下幾千里

勸地西來四十程儘把范滂車上志都償令伯表中情
從今九折邛邲路看取前驅叱馭行

寄茅山許宗師二首

纔脫朝衣著法衣石壇星斗自光輝鶴曾有約從天下
雲本無心出岫飛洞裏仙人時共語山中騷客日相依
幾時道眼窺凡骨前世同游果是非

新自三峯頂上歸恨余不遇老宗師丹泉豈是人間酒
翠壁空題醉後詩孤月墮時猿叫早五雲深處鶴來遲

洞天若有游淮者手折寒梅寄一枝

茅山梁書記以二詩見寄依韻奉答

辨香勾曲謁東卿回首人間萬事輕
空翠旋添詩筆潤軟紅不染羽衣清
松風枕上游仙夢桂月巖中避俗情
咫尺三峯飛不去孟城又過臘嘉平

占斷仙家翰墨場仙家亦有沈東陽
詩含蒼朮湯中味書帶黃連餅裏香
萬里雲霞騎鶴客五湖煙雨釣魚郎

相期不得時相見恨殺南鴻獨自翔

梁以朮連
二物見送

寄李參政

當路諸公盡賞音誰教拙宦到而今曾衝霄漢無多遠
忽墮泥塗有許深故國山川勞望眼小園松竹負初心
也知生世多磨折不似年來未易禁

和參政馬公韻

家具無多復此遷壯懷亦不似當年扁舟直繫金山樹
醉筆曾題玉井蓮北闕一番新雨露西巖千里舊風煙
庾塵且莫輕相汚門有寒潭萬斛泉

送崔參政還鄂省

政柄由來不易持，絃更後可重揮。
相門出相古亦有，賢路薦賢今最稀。
鄂渚雲開山似畫，盧溝雪盡馬如飛。
太平經濟非吾事，擬對東風賦式微。

和寇冷泉總管見寄二首

生世多愁故少歡，每於平地起驚湍。
分無一斗蒲桃酒，夢想三年首着盤。
足自病來常倚杖，髮從短後不衝冠。
此身僥倖催租了，便是雲間第一官。

數千里外是吾州苟祿真成大繆悠仕選近來難著脚
權門何處不低頭身辭北闕長為郡目極中原漫倚樓
自把行藏曾較計餘生豈止四宜休

代同恕送趙彥文總管

南山從此失崔嵬幾日賓筵許再陪事不留難真老手
民無愁嘆信良才思何畎畝應難想借寇朝廷倘許來
折盡銷魂橋畔柳奪侯東去忍人哉

送孫總管

借臨剝覺廟堂難劇郡須煩老手賢威惠能令有張趙
聲名從此失廊延杏紅槐綠絃歌地雨潤風柔稼穡天
濕盡秦民衣上淚可能明府不留鞭

送蘭總管之開成

郡守掄才自昔難漢家由此入天官青松雲壘千年秀
玉海霜澄五月寒禁止令行言易信入耕出戰力能寬
清風後日甘棠頌擬就崆峒石上看

代許有壬題朱舜咨總管德政詩卷

魏公三至福斯民今見真才繼後塵千里秋原均樂土
一時寒谷便回春空教渤海傳龔遂爭似吾鄉得買臣
竊祿逾涯歸已晚受塵何幸作閑人

送王從義赴東平總管

東府多儒冠列州凋零今似葉經秋田廬復值連年水
牧守定懸千里憂教養政思吾子去循良當向古人求
政成自有如椽筆擬作歌詩頌魯侯

送王仲方赴彰德總管

金匱要略卷之七
卷七
天門魚鑰換魚符華髮偏宜皂蓋車愧我老非鄉郡判
嘉君名入御屏書莫憑鄴下一時語當念民心三代初
洹水先塋滿松柏春風餘力望吹噓

送徐可翁總管

括山咫尺不相逢萬里飄零始識公江表一麾頭欲雪
牀頭孤劍氣如虹分忘貴賤襟期古論到行藏意趣同
多謝過從情戀戀為憐逆旅困新豐

代送趙總管

器方申甫不相先才比龔黃覺更賢三載餘恩勞酌水
幾回清諫夢瞻天鳳麟本為明時出霖雨難容此地偏
矯首青雲九天上莫忘七十二名泉

送成仲禮除黎城令

九萬扶搖第一程今年試手治黎城東風金水河邊別
西日青山道上行墨綬銅章元自貴冰壺水鏡不妨清
蒼髯老父無他望日日逢人問政聲

送季山長

卷七
季山長長卿自杭而來寓松江郡學經理西湖書院養士之田再閱寒暑無一毫倦怠可嘉也已因其回詩以餞之

西湖山長新職任西溪中丞舊主公衆譽共知儒者行孤清猶帶憲司風扶持學校寧無策經理田疇最有功誰道吾儒不辦事似君辛苦幾人同

輓宋鑑山先生

憶昔秦中見鑑山當時雙鬢未全斑三書早達朝廷上

十卷長留天地間已歿交遊皆紀善暫居風憲便求還

秋漪亭上尋詩句誰管蒼煙白鳥閒

早年赴闕上利便十餘事四海交游

詞次第為十軸故有三書十卷之語

輓杜緱山文玉先生

雲壓緱山慘不開少微無復近三台

余在相下曾有壽先生以少微光彩

近三台之句

五車書富身何在九老圖空事更哀自古人材

難適用從今天道轉生猜淒涼通德門前路不及安車

一到來

送庭秀赴隴右按察副使之任

職到當然義必為一身初不計安危須知天理昭明處
難似人心洶湧時白簡霜華辭憲府繡衣風采照分司
隴西若問公平昔請誦諸君送別詩

選杜緱山詩

緱山人去已多時獨對遺編動所思墳上不澆千日酒
世間空愛七言詩追隨工部仍多感摹擬樊川更好奇
昨夜燈前選佳句疾風應報九原知

曹杜聲名已並馳楊王蹤跡久相隨
千篇雖富少青眼一字未安空白髭
得法從初緱嶺學命題多是相州詩
可憐十五年前死不見中原混一時

和張秋山壽詩韻

今年此夕倍光輝新得秋山七字詩
潯水傳來仍有派寓齋仙去更無師
清如映月梅花朶老似經霜檜樹枝
忙著錦囊收拾起他時不獨詫吾癡

送程運副子充還都

吏部鄰牆幾過春天涯相遇更相親人材自是有高下
仕宦豈能無屈伸歸騎慣行金水月敝貂重拂玉京塵
諸公若問松江牧政拙催科第一人

送石漢臣副使兼簡庭秀敬甫

瓊華時節到揚州忽向花前感舊遊烏府官僚自文采
青宮人物儘風流兩淮春色浮杯面三楚山光在筆頭
苑杜諸公如見問珠湖新買釣魚舟

安仁簿吳帝弼以詩求跋燕都諸公送行詩既

題其後復用來韻

都城桂玉不關心日日長吟復短吟
冷地誰逢人薦譽清朝半是子知音
一封黃紙中書牒八品青衫主簿箴
五老峯頭舊遊處停舟為我一登臨

雲浦亭晚坐詩

晚上危亭亦快哉清風如水辟塵埃
座中煩暑酷吏去門外好山佳客來
萬景祇除詩管得孤懷正賴酒澆開
從今不厭經過數為報沙鷗莫漫猜

送周學正漢東還杭州兼寄方虛谷

君為辭家莫愴懷我憐無地可留材江頭水落鱸方出
涖口霜餘蟹正來九月又驚萸節過一樽更對菊花開
因風寄謝方虛谷擬答新詩尚未裁

別劉監觀太素玄都觀作

別却玄都歲已深抗塵走俗到如今種桃道士今誰在
學李書生喜重尋客枕關山千里夢雨牕燈火十年心
從今不厭經過數綠髮仙官是賞音

送周蒙正臨安糾曹

郡曹清冷半年餘坐覺多閑似舊時偶為尋僧參假早
還因覓句坐廳遲幽憐宿鳥同歸院貧喜春蘿當揀籬
留客雨晴應捲箔况聞庭木是新移

吳博文來自平江將歸因此送之且用渠韻

十月風霜變翠林恨無絲柳繫歸心荒烟平楚千年畫
落日澄江萬頃金著脚雲霄嗟我懶盤胸星斗許君深
明年五老峯頭去石壁松風聽鼓琴

送楊穩山兼簡陳鐵齋

燕市東風酒一觴
燒燈時節別髯楊
江南春色添袍綠
天上恩光照勅黃
後學要聞新議論
前賢惟愛古文章
鐵齋諸老如相問
夢寐高沙似故鄉

送房唐卿

藥石中間半上卿
傳家何害以醫名
乘時當展四方志
應召無憂萬里行
神祕術從前世得
鬼遺方到後人精
從今萱草堂中夢
定向穹廬月底成

蒯秋江持二詩來別將歸黃州因以送之

白鴈南來蟹正肥
可堪來作決然辭
病中送客難持酒
枕上呼兒代寫詩
赤壁江空霜落後
黃岡樓靜月明時
王蘇二老英靈在
更為臨風酹一卮

送范約莊浙東憲幕之任

杭州只向越州行
賓幕無如憲幕清
萬事不須深著意
一官當以近為榮
山搖嶽動時難得
風定潮平句易成
歸見西湖煩寄語
舊游人亦白頭生

送蜀儒王壽甫歸自燕都

滌器鑪邊笑長卿卜錢簾底問君平青衫未了三生夢
白髮猶須萬里行老馬關山天上道敎貂風雪日邊城
冷雲不放峩峩月誰照先生去國情

徽州朱教授以詩見寄余因依韻送行

五載艱辛不一陳却從詩句見溫淳同時知己無多子
異地逢君有宿因鴈引歸心離闕下鶴留行李住江濱
紫陽香火今消影要與荒祠作主人

池州教授吳蘇坡持閭內翰子靖餞行詩來且
以唐律徵言於余因次韻答之

翰林詩筆自輝煌能使蘇坡姓字香為學必須從義理
教人初不在詞章一身觀國元無物八品還鄉亦有光
明日江行發新興倚天山色照池陽

寄曹光輔揚州教授

吾曹莫道廣文寒世上無如此地安宦海風濤無駭夢
慈闈日月有清歡諸生正慕孔常甫一念要參鄒志完

近日橫江樓上望為余曾倚北闌干

送朱墅翁教授太平州

不惜長書別薦君喜君此職繫斯文一輪采石磯頭月
萬朶青山頂上雲經亂尚餘功父集更忙先拜謫仙墳
眼前盡是新詩料要看飄然思不羣

送余義夫衢州教授

占得榮鄉第一除上饒境界接三衢

余信州人

常教學校無

虛席誰道朝廷不用儒文采曉鸞方絢爛形容秋鶴最

清癯萋萋煙草藍山墓為我殷勤一酌無

陪台察諸君養樂園宴集二首

再上茲樓感客心金杯先怯十分深人情世態有新舊
山色湖光無古今蓮蕩風翻紅艷艷柳橋煙鎖綠陰陰
百篇佳句題評盡誰似容齋最賞音

廉察諸公雅集時也須逋客共追隨祇因栢府交情好
忘却松江職分卑病久不禁新酒醉興來猶記舊題詩
十年蹤跡今如此慚被風標白鷺知

奉陪容齋諸公西湖雅集二首

白石清泉五月寒每逢佳處輒忘還
細聽禽語高低際絕勝人情喜怒間
萬事不如連日醉千金難買暫時閒
明年擬作比隣住留我臨湖一半山

炎歊無地散襟懷遠作茲遊亦快哉
湖面好風將暑去山頭落日送陰來
半巖松竹新精舍四座衣冠舊憲台
最喜容齋今有暇飲樽更約幾時開

過蘇州

一從鳬燕葬閭閻幾見麋鹿遊姑蘇山城不逐往事改
風景豈與當時殊官旗直送糧入海私舟盡載鹽歸湖
鄧侯不來謝不去臨風弔古獨躊躇

焦山

金山東畔一峯青長與江流作畫屏古木深巖藏寶剎
浮雲絕頂見滄溟老僧去洗降龍鉢游客來尋瘞鶴銘
問著平吳石無語晚風吹葉打疎櫺

蔣山

一片風煙畫不真好山却與寺平分題名多是王安石
得姓元因蔣子文鶴怨猿驚人已去龍蟠虎踞世空聞
憑誰指似南朝事十里青松樹拂雲

一片青山畫障開入山便不覺塵埃泉聲時帶松聲落
雲氣常兼海氣來乞食僧歸牕動竹讀書人去洞生苔
有心更欲登危頂却被鉤輈苦喚回

半山人去寺留名想見騎驢道上行因屋爭墩猶有說
舍家為寺果何情舊題到此俱零落新法於今幾變更

欲弔英靈無處問春風吹斷杜鵑聲

龍虎臺

龍虎臺高拱帝京巍然欲與此山平
山花開近重陽節野鶴來聽萬歲聲
天下洪基蟠壯麗雲間佳氣鬱崢嶸
年年積粟峯頭月長照君王象輅行

和尉仲明悼馬韻

驂騑一病病何深千里精神遽陸沉
架上漫餘籠背錦壁間空掛絡頭金
誰知墮地追風力不及歸鞍帶月吟

明日柳河川上望野煙秋草總傷心

悼馬荊校理文紀見索同王嗣能教授賦

幾載京都歷苦辛半途天奪玉麒麟立殘西署樓前月

興文署有樓

踏盡東華陌上塵無夢天閑三品豆傷心銅櫪

一番新最憐渾水東邊路不及歸鞍畫錦行

欽定四庫全書

西巖集卷八

元 張之翰 撰

七言律

元日

雲鎖西山舊隱巖，抗塵走俗復何堪。
青雲人物斗之北，白髮宦遊江以南。
故國四千還減一，流年五十又添三。
千辛萬苦都嘗遍，祇有吳淞水最甘。

再到上海

今春鄉保住催科便覺居民氣自和下海人迴蕃貨賤
巡鹽軍集哨船多夜無巨盜且安寢時有小娘能唱歌
父老怪余何太苦鬚毛又比去年皤

題徹見閣

危欄真在澱山尖不放雲煙擁畫簷形勝露時無障礙
眼神明處有增添半空嵐氣隨揮筆萬頃波光入捲簾
莫訝新詩容易得清香一炷讀華嚴

不寐

四壁蕭然春夜深夜深無寐更難禁聽殘苦雨頻欹枕
挑盡寒缸獨擁衾千里故園難入夢十年往事漫經心
少時情味何顛倒却道良宵直萬金

過靜安寺

流水年光老此身東風又是一番春寺僧無語肯留客
沙鳥有時來傍人防盜溝渠蘆葉老勸農村落杏花新
三年善政無堪紀辦得題詩徧海濱

三月二十二日同諸公泛舟水門外

何處春盤正好行
會波樓外雨新晴
杯中酒影搖山影
花底簫聲帶水聲
隔岸人家渾似畫
傍人鷗鳥總忘情
猶嫌歸棹匆匆去
不得哦詩與月明

一色春波正渺瀰
雙舟衝破碧玻璃
人離北渚歌才放
酒到黃臺價自低
座上有山皆畫樣
眼前無物不詩題
餘情更欲歡游去
風雨時來恐路迷

遊清隱寺

不見當年禹鑿痕
兩山開處一山門
寺從木杪誇形勝

泉向峰頭認本源一縣香燈供古佛數聲鐘磬落荒村
我來欲寫興亡句慚愧蘇家好弟兄

澱山寺

半空白塔倚雲端一股清流到澱山擊鼓撞鐘來問訊
舍舟扶杖費躋攀祇今田畝縱橫際疇昔波濤洶湧間
身是十年曾過客老僧應怪鬢毛斑

宿龍華寺

十二年來復此行半空樓閣尚崢嶸入門纔見燈燭影

歌枕不聞鐘磬聲風軟松江鱸欲上月明蘆浦鶴初鳴
老僧錯認雲間牧却作分司禮數迎

宿資福院

數竿修竹語幽禽睡起茶餘亦賞心溪叟入門瞻古佛
寺僧行道念觀音遲遲白晝香煙冷寂寂綠陰牕戶深
我是三生舊遊客作詩聊寄去來今

寓松江道院

此地空餘道院名寂然不聽步虛聲新旗誇酒隔離出

小艇賣魚緣港行潮落潮生分早晚雲來雲去弄陰晴
四年為郡經過熟諳盡民情與物情

謁梨山廟

生祇為侯死即王建安今抵幾桐鄉一篇佳傳從前宗
千首新詩動晚唐白叟黃童知姓字丹崖碧水借輝光
秋風十里東城道珍重靈祠一炷香

異代衣冠儼若生歲時香火郡人情山靈訶護穿天句
溪水流傳動地聲一片英雄心未了千年盜賊胆猶驚

殷勤願賜梨山夢吾道何時一再行

夢游雲門并序

余自寓青社府學之時習閣日與雲門山對
蓋朝霏夕翠已飽觀之矣但公事倥傯竟不
獲一遊後出北門還濟南是夕乃夢登焉追
賦是詩以道其髣髴

擬向東南望帝孫先從西北上雲門青州形勢全開隘
滄海風煙半吐吞大禹鑿來功最遠老龍過去跡猶存

下有卧
龍洞

題名恐有當年我認徧雙崖字字昏

題青霞觀

半空樓觀碧相連此去瑤池幾千月戶雲窓足瀟灑
翠鸞白鶴自蹁躚燈搖不夜鄉中地花滿長春洞裏天
底事慙慙不嫌客羽衣中有鄧胎僊

蓋主觀者
鄧其姓也

輓魏中丞太初

一病如何竟莫支憶君還恨過江遲祇知異地多歡聚
誰料中天遽別離名位共期前路遠精神何自內臺衰

不堪更讀川行藁淚盡當年唱和詩

生值壬辰歲又辰嗟嗟六十一年身學從正派篇章古
政出通才論議新黃閣風清何太苦烏臺霜重未能春
伯牙絃絕知音少哭落江頭月半輪

身去空留世上名青崖不似舊時青千篇文字歸家集
三品階銜入墓銘無德至今仍顯宦有才如此不延齡
著詩難挽英雄住悵望中天執法星

丹青閣二首

落日涼風散客懷，丹青閣上亦悠哉。
酒從有限盃中得，詩向無聲句裏來。
清景不隨流水去，白雲正傍好山開。
恨無九節仙人杖，更上峯頭望九垓。

衆山環抱獨峯開，二水奔流一道來。
不著飛甍相壯觀，恐孤造物巧安排。
板題詩句留塵碧，竹引泉聲落石苔。
自笑本無歸隱計，問僧先覓兩青鞋。

壽中齋留學士

水鏡清無半點埃，兩朝耆舊一中齋。
狀元宰相無餘地，

金匱要略卷八
吏部翰林難盡才遼鶴鍊來臞骨相蜀鷄知得老情懷
君思未許青霞洞幾度松風掃綠苔

贈張祭酒

祭酒先生選最難去年有詔起秋山師嚴教育人才際
道在尋常日用間木鐸金聲千古振杏壇春色幾時還
斯文一脉關身重莫嘆蕭蕭兩鬢斑

敬齊先生壽二首

學海波瀾接性天兩朝誰不讓文權四賢堂上無餘子

三老山中只此僊

平定有四賢堂又先生有封龍三老會

身健宛如辭院

日眼明重見渡江年天教上壽非無意混一車書要正

傳

四海聲華李謫僊老來風骨愈飄然授經近似伏生歲
書亥過於絳老年九轉丹砂休漫語一篇胎息是真傳
請看龍首峯頭月常向中秋席上圓

棣華堂

三復周家管蔡詩名堂以棣最為宜細看花萼相承處

便是弟兄無間時風貢餘香來几案日供和氣滿瓊麓
紱荆田氏那能比曾長芳枝一夜衰

和君卿憶別業韻二首

長記交遊百尺臺一樽隨意坐莓苔平湖灩碧臨三面
濁酒潮紅上兩腮清景不為人妄取幽懷只許我常開
煙波舊侶應相怪有底忙時不肯來

御柳看看一再芽歸心不信萬山遮燕都仕宦元如客
甌社田園便是家香雪半林梅欲子錦雲十里槿初花

而今風物無人問，忙煞孤村數點鴉。

風月堂和魯茶山韻

丹泉湧處復誰知，名字空存陸瑁池。
蜃氣飛來留此地，鰲頭突出勝當時。
休論風月堂中景，且看茶山石上詩。
擬闢荒萊田十頃，諸生勤苦莫言飢。

書院規模祇自知，燕居樓壓放生池。
塔如文筆新興日，山似書墩舊築時。
水底魚龍欣聽講，沙邊鷗鷺解催詩。
余生嗜淡真成癖，常倚危欄不覺飢。

山光水影翠相磨最是西湖勝槩多香火有靈來顧陸
光陰無計住羲娥盡窮聖道無虛過老上人頭不奈何
舊日藍袍今有象門前楊柳已婆娑

人材自古出磋磨郡牧尤當著意多今日來芹游谷水
他年折桂問姮娥每逢閑暇須留此要著文明奈滿何
且喚雲間千歲鶴風清月白共婆娑

守歲

兒女團團一笑生安排詰旦作新正愁隨酒醉須臾散

喜入燈花分外明
願報春來風有信
不留臘住雪無情
十年舊事關心切
恨煞譙樓未五更

丙申元旦

碌碌雖無治郡才
新正有句也須裁
庭中爆竹驅儼後
枕畔燈花報喜來
四載因循留谷水
五雲依約望蓬萊
從今儘有東風便
為問歸舟幾日開

立春

綵燕釵頭恰剪裁
土牛杖底已塵埃
歸心未離海邊去

春信又從天上來三泖雪消詩筆潤九峯雲盡畫屏開
松江租稅如山重只願豐年養不才

海棠

冶葉輕翻翡翠翎司花薄剪軟紅啼涵暮雨愁無那
睡着東風喚不磨正要驚膠多固護儘從鷄舌少薰蒸
錦城三月春如畫恨煞無詩杜少陵

柳風

綠絲縹緲出絮飛殘長在東風注意間弄月輕搖深院落

和煙斜搭曲闌干愁顰眉黛渾舒却舞徹腰支不放閒
怪底新詩容易得牧牛圖上舊曾看

游絲

催老青春夢一場自斜自整自悠揚裂殘蛛網有誰續
縵出繭窩無許長西日遠牽芳草恨東風輕惹落花香
最憐織女不收拾誤却天機雲錦裳

承中齋學士見和鄙語仍送芍藥數枝故復用
韻奉答

離離花影正翻堦分送春光到小齋宰相四人元有數
翰林七字豈無才流紅滴翠驚衰鬢摘艷熏香慰客懷
却憶揚州舊遊處曲欄幽徑已蒼苔

楊太尉祠故基

魚集堂前始奮飛鳥鳴地上已堪悲生平清白傳千載
身後聲名在四知野蔓帶煙迷古塚土花如雨漬豐碑
魏公既歿知公少更有何人為立祠

樵雪

風雪無絲暫息肩歸時更比去時難衝開太素單衣濕
分得鴻荒一擔寒水樹枝枯腰偃僂石頭逕滑腳蹣跚
此真若有人能畫送與朱門仔細看

梅溪雪霽

才返芳魂到水隈碧枝低壓豆蔻灰香從冰窟冷邊得
春向玉壺深處來孤白不隨三白老六花翻作五花開
幾番為覓林逋去不見西湖路却迴

竹塢夕煙

歲寒高節若為容落日蒼煙共鬱葱龍藉暝陰歸變化
鳳啣晚色入空濛山陽僊境氤氲外渭上人家水墨中
恨失此君真面目却教桃李媚春風

炊煙

霧洩雲蒸老屋低初如蔥鬱漸熹微寒迴黯突春生處
暖入黃梁夢熟時附熱耻隨殘燭盡騰空甘近太陽飛
祇今五鼎無消息慚愧家人賦庾庾

煎茶

魚眼才過蟹眼生小團湯鼎發幽馨三生竈鬼清無夢
一夜波神沸有靈竹雪熟時浮乳白松風響處斷煙青
莫教移近銷金帳恐被羊羔酒染腥

食栗

只為中藏一味甜豈容外護十分嚴矮爐入夜從渠爆
深袖藏春旋自拈蠟彈破慳侵指甲蜜泥供軟上牙尖
燕人若准今年直千戶侯名更合添

生肺

空囊纔注未容持赤手連呼已厭遲
水桶浸殘紅瑪瑙
霜刀分破瑤琉璃
玉盤狼藉羣喧處
襟袖淋漓半醉時
莫訝庖人好貪奪陳平元不是渠師

謝馬希驥攜酒相過

常持樽酒幾相逢今日方知酒有功
神物似丹醫病骨
春風如水洗愁容
二豪遠避三杯外
萬事都歸一醉中
誰把餘醒輕散却
菊花香滿玉冲龍

當爐

漫說窪尊與老盆，爭如此地着閒身。
但教白墮長留物，何用青帘苦喚人。
滄海風波幾升斗，醉鄉日月一比鄰。
百錢不到文君手，負殺成都市上春。

槽聲詩

漉巾不學老淵明，渴枕先醫病長卿。
老瓦盆傾金盞灑，小槽床壓玉泠泠。
流來神漢渾多水，滴破愁城幾許兵。
欲識無何鄉裏路，請君細向此時聽。

虎頂杯

李耳頭顱老更頑製為飲器費雕刻寢皮食肉人方渴
怪雨驚風興未闌乙字影沉雲液暖樞星光浸月波寒
九關威猛成何了不滿劉伶一笑看

謝鄭小溪螺杯並序

曩在泉南諸士夫嘗以海螺飲余取江瑤柱
為脩北歸十年無復茲况後訪閩中鄭小溪
於燕都集賢東院小溪為余出此杯酌官釀
酒再行復舉杯見贈雖無江瑤柱興自不淺故

謝之以詩

洗盡湖醒着聖賢豪吞正要腹
嘯然宜呼南國江瑤柱
絕勝東坡藥玉船滄海波濤供我醉
明珠光彩照人圓
安排古錦牢藏起恐是當年白水僊

芝蟾硯滴

三生不死月中精誤落銅芝老研
鉗一朵瑞雲留晚漬
半泓寒碧吐秋腥烏絲欄畔香凝
夢翠琰屏邊夜效靈
咫尺玉堂天共遠為渠羞道應文星

吾道存來一線如發源猶賴此蟾蜍含香有意新科斗
逼褚無心食蠹魚靈草覆雲相護藉怒願得水自吹噓
何如化作龍泉去取國而今不用渠

同王簡卿賦菜石瓢杯

秀氣憑凌老瓦盆玲形追配古窪尊聖清透骨香無累
顏樂傳心篆有痕半破瓠瓜餘玉蒂一凹琥珀斷雲根
菜山便是壺天路幾度春風引醉魂

桃花石虎枕同李德真賦呈敬齋

天台洞裏老雲根又是於菟一化身萬點胭脂春映席
半凹寒玉錦成紋帝閣有路偏饒夢山骨無香亦可人
秀色本期相枕藉且休說是李將軍

王指揮御賜拄杖

太尉延年僅與同太師靈壽豈相從木為方竹全奇節
玉與精金緣直躬攜出龍樓香霧濕拄來鶴禁瑞煙濃
九重優老非徒賜要看扶持第一功

憲蕭寄胡紹開

破楮秋聲苦見侵疎櫺雅頌洗哇淫鑿開天賴難名曲
吹出人生太古心青鎖夢邊蝴蝶去白駒影裏鳳凰吟
可憐高趣無人會全賴西風是賞音

咏鞦韆趙同知索和

岸頭垂柳正婆娑岸上佳人簇綺羅但願飛身到霄漢
豈思舉足是風波春風畫板塵生鞦斜月朱繩影浸河
咫尺清明寒食了落花池館夜如何

謝魏晉卿竹鞭

勁節貞心直似弦此君何自入吾拳
三春花柳雙鞘外
萬里關山一握邊
神算每期劉晏後
壯懷長恐祖生先
何時得意馬蹄疾
滿袖春風拂錦韉

寒食郭西

前年寒食寓錢塘
今歲清明在谷陽
佳節此時偏酒美
春風何處不花香
無機應物真高論
有病安心是秘方
愛煞跨塘橋畔柳
柔條又比舊時長

花柳青紅做禁煙
水村高處見鞦韆
茫茫丘壠幾千里

草草杯盤第四年郡牧姓名今久矣田家老穉亦欣然
一官直在松江上却恨催歸欠杜鵑

感白髮二首

素髮飄蕭四五莖安排老態最無情青春不向此時駐
白雪適從何處生倦客關河多感慨催人歲月太崢嶸
破囊收起青銅鏡不用從今抵死明

鑷不勝多染又羞星星漸比向時稠形容賈島絲邊白
粧點安仁鏡裏秋無路可尋年少夢有根應帶夜來愁

頭顱自顧今如此合理煙波舊釣舟

題靳公嘉議八秩詩卷

八旬精健樂閒身三品榮華養老恩學本治人先治己
官能傳子更傳孫天壇玉屋煙霞峪沁北丹東水竹村
白髮地仙人不識壺中別是一乾坤

壽孫教授

鄉先生也時八十餘尚康健

故國河山兩鬢皤新亭風景五噫歌鐵筒儘貯詩書句
銀管先書德行科化日斑衣萱草室春風白酒海棠窠

他時擬續鄉賢傳應數先生壽最多

寄趙方塘學士

蘭金分義君誰似桂玉情懷我獨知無暇便中常問訊
有時夢裏忽談詩清霜新店聯衾夜落日香山並轡時
二載南來了何事簿書堆裏鬢成絲

為孟德鄉壽

再受恩綸別有期儘渠若若復纍纍名從魯國興文日
志在吳宮捧詔時筆底江山見神助胷中兵甲果誰知

不須苦種東城柳黃閣歸來恐未遲

花朝雨中漫書

料峭餘寒尚未收客中懷抱又杭州人生百歲五十過
春事三分一半休落筆雲煙生疊嶂滿簾風雨捲層樓
兒童問得湖船價擬待新晴作醉游

題冷泉亭詩

鬱鬱松杉夾岸栽一泉辟盡萬塵埃秋聲入枕琴筑響
月影上階圖畫開板閤放時翻白雪石欄潤處長青苔

樂天舊記今猶在不為茲亭也合來

宿三茅觀

擺脫人間萬事忙肩輿夜入白雲鄉
照開黑暗千枝燭熏透清虛一炷香
獨鶴不知塵夢寐老仙都著羽衣裳
開軒看罷西湖月受用松風枕上涼

過分水嶺二首

順坂纔踰逆坂迎川形全似蜀中行
正逢佳處雨還作恰過險時天却晴
流水有聲爭作派好山無數不知名

逢人試問泉州路猶指東南十六程

行盡東南數十州恰由吳越入閩甌人過嶺外猶南去
水自山前不北流石棧霧來如黑夜松林風過似清秋
著詩收拾中原去擬向吾曹說壯遊

到寧海

城郭山光翠欲流人家疑與水相浮直從西北天高處
行到東南地盡頭三面波濤連大海一隅形勢限中州
海風吹落無塵句要向崑崙頂上浮

泉州清明

寒食清明節最佳
滿然無物慰天涯
煙凝海氣惟聞瘴
風掃春光不見花
二十年間長是客
五千里外漫思家
故丘松栢今何似
為問南來數點鴉

元日呈姜中丞

瘴海歸來歲又遷
青紅兒女拜燈前
喜浮栢葉深杯裏
春到梅花曉角邊
縱挽莫留唯少日
急推不去是新年
憲臺賴有賢知己
試讀東風第一篇

李野齋壽日

前朝諸老已彫零翰苑須公共主盟三鳳羽儀來北闕
四賢名價自東平世有李孟
闕徐之稱德曾比玉元溫潤文似為人
更老成欲識野齋高幾許無窮風月儘清明

張碩天母氏八十壽

慈孝家聲到處知錦囊消得玉堂詩奉親無樂可過此
游官有誰能似之戲綵堂深春盎盎肩輿路穩晝熙熙
年來兩目明秋水待看賢郎德政碑

輓胡紫山紹開二首

一杯泪濺酒光寒
落日江南酹紫山
累召不行今絕少
急流勇退古猶難
文章勲業乘除裏
太白淵明伯仲間
擬續吾鄉耆舊傳
清名流與後人看

吾道衰微吾輩少
聞公不起即長呼
追還天上羣僊籍
零落人間九老圖
自視功名真土苴
人藏翰墨重金珠
醉中便跨鯨魚去
萬里天風酒醒無

輓華野渡

前輩雲間似曉星
祇餘此老又彫零
書檠倚壁將安照
史筆生塵更不靈
一脈纔傳三嗣子
九峯已減十分青
知公最似松庭鶴
夜夜悲鳴未肯停

輓倪水西

識者嘗將骨相評
憐君太瘦惜孤清
濟時命薄纔分教
弔古詩多最得名
東野情懷貧至老
許渾才氣死猶生
一盃楚些空惆悵
涓滴何曾徹九京

輓安卿

烏府諸公最愛君當時為地亦慙慙豈期千里別離後
便有兩塗生死分萬里雨餘新掛紙松廳塵暗舊彈文
臨風一把傷心淚灑向都門日暮雲

張誠明墳

乘風去後訪遺蹤墳在諸僊更向東白石青松新境界
珠冠金帔舊儀容葆玄壇上言猶在觀化堂中夢已空
消盡香煙見孤鶴却疑飛下五華峯